




Sait pei na kisim sevis hariap

PASIN bilong givim mani long sait na kisim samting em bikpela pasin bilong yumi ol pipel bilong Papua Niugini. Trangu ol pipel long ples i nogat. Em pasin bilong mipela ol save manmeri bilong taun na siti.

Mipela laikim bai sampela kain gutpela pei o sevis i mas kam pastaim orait mi mekim dispela wok bilong yu.

Long ol opis, bai yu no inap kisim pei o sek bilong yu hariap inap yu mekim naispela tok-tok long pei opisa pastaim. Kain olsem, bai mi baim wanpela siks peks bilong yu o K10 bilong yu bai stap long sait. Dispela kain nek bai yu kisim stret kleim o mani bilong yu long akaun opis hariap tru.

Nau yumi harim na ritim long bikpela paul pasin opis bilong Lens i mekim long givim graun long ol man nabaut we i no bihainim rot bilong salim ol



graun long ol man. Dispela em ol graun bilong gavman. Olsem wanem graun i lus nating olsem?. Em i no wanpela liklik samting bai yu haitim long poket na givim, oloman, em graun ya, hat tru long karim ya. Tasol ol saveman i haitim na givim long ol ausait lain na gavman i no save ya. Mi ting bikpela hait pasin i stap na husat gavman opisa o Lens opisa i mekim dispela i kisim bikpela mani tru na dring planti bia tru ya.

Sampela gavman opisa bai yu paul tru long lukim olsem ol i save dring bia olgeta taim long olgeta wik. Bai yu tingting planti long ol i save kisim mani

olsem wanem?.

Nau planti grasrut lain bilong yumi i luksave pinis olsem taim ol i go long ol gavman opis long kisim sevis o helpim, bai ol opisa i no save sevim ol hariap. Olsem na ol i klia pinis long dispela pasin bilong BRAIBERI bikos yumi ol save-manmeri o skul lain i soim ol. Olsem na nau ol ples lain tu bai karim wanpela buai bilong yu long bek na kam long givim yu long stretim pepa bilong em hariap. Sampela taim bai ol i mekim gut tru long ol dispela gavman opisa olsem baim kaikai bilong ol o givim ol sampela mani mak olsem K100 o K200 samting. Em long skel bilong ol. Ol bisnisman tru bai givim long K1000 i go antap. Dispela pasin i kamap bikpela pinis na ol dispela gavman opisa i save gut tru long ol bai i gat lans olgeta taim.

Long ol kampani em ol wok-

man i save traim long mekim sait wok yusim ol tuls na masin bilong kampani long mekim liklik mani long sait. Em bikpela pasin bilong yumi long PNG tude.

Wanpela palamen memba i bel hat tru na i tok, mi wetim distrik mani bilong mi na Fainens opis i no givim hariap ya. Olsem na mi mas painim sampela mani na go givim ol bai ol i hariap salim ddistrik mani bilong mi i kam hariap long ilektoret ya. Em i belhat ya. Lo i oraitim dispela mani tasol sampela opisa i abrusim em gut tru. Wanem samting tru i kamap ya?. Tingting na save bilong yumi ol PNG pipel tude i go nogut na krangi olgeta.

Mi wanbel long kisim ol ovasis opisa i kam wok long wanwan gavman dipatmen na opis nau. Nogat bai dispela sik nogut bai i go bikpela na nogut olgeta long bihain taim.

Wanem promis yu mekim, yu noken brukim

TAIM yu mekim wanpela tok promis, yu noken brukim. Saveman 5:1-7. Yu i no ken promisim wanpela brata bilong yu nating, taim yu tokim em long givim o mekim o kam bungim brata o i go tokim na arapela moa. Yu tok yes bai mi mekim olsem na bihain yu i no bihainim ol toktok yu bin mekim. Yu ino ken ting dispela em i liklik samting long ai bilong God. Matyu 18:8 i tok, sapos yu pasim wanpela tok long dispela graun, long heven tu i pas. Na sapos yu lusim wanpela tok long dispela graun, long heven tu i lusim. Taim yu tokim narapela brata na yu tok, bai yu givim o mekim wanpela samting long



em. Dispela tok i pas namel long yu na dispela brata long hia long graun, tasol long heven God i pasin tu. Sapos yu i no bihainim ol dispela tok promis yu mekim, em yu i rong nau, olsem na yu wantaim God bai i skelim dispela tok long bihain. Saveman 5:4-7 Sapos yu i laik promis long mekim wanpela samting yu i mas tingting gut pastaim orait yu mekim.

Orait nau mi laikim ol manmeri husat i redi long resis long 2007 Nesinel lleksen. Yu i mas tingting gut pastaim orait yu i mas mekim wok kempein bilong yu long 2007 Nesinel lleksen. Sapos yu i traim hat na yu lus em i orait, tasol sapos yu i winim wanpela sia, yu i mas bihainim olgeta promis yu i bin pasim. Olgeta taim planti kon manmeri i save i go raun na mekim kempein bilong ol na mekim ol promis nating nating na i no save tru tru long ol, i no save bihainim na kamapim wanem em i tok. Yu i no ken ting dispela promis yu i bin mekim na i no bihainim, em i liklik samting long graun yu i bin pasim na long heven i

bin pasim pinis na i stap. Sapos yu i no bihainim olgeta promis yu i bin mekim long hia, tasol long heven i stap yet, na long las de bai kot i skelim. 2 Stori 6:12-42 Taim God i bin makim Solomon long kamap king, em bin daunim em yet na em i askim God long givim em moa gutpela save na gutpela tingting long lukautim ol Israel. Olsem na God i givim Solomon planti gutpela tingting na save. Sapos yu i laik kamap lida, yu i mas daunim yu yet na i no ken i go toktok nating nating na promis nating nating. Taim yu i go raun na wokim kempein raun yu i mas skelim tok we i gutpela long helpim yu yet na ol manmeri tu.